



Groupe parlementaire

Här Claude Wiseler

President vun der Deputéiertechamber

19, um Krautmaart

L-1728 Lëtzebuerg

Tratten, de 14. Dezember 2023

Här President,

esou wéi d'Chambersreglement et virgesäit, bieden ech lech, dës parlamentaresch Fro un den Här Sportminister weiderzeleeden.

Méintelaang goufen extern Mataarbechter vun der Sportsschoul net bezuelt, nodeems engem héije Beamten de Manktem vun enger legaler Basis fir dës Iwwerweisungen opgefall ass. Dem Artikel „Die Rolle rückwärts von Georges Engel“ no, deen den 9. November vu Reporter.lu verëffentlecht gouf, huet dem betreffende Beamten seng Aschätzung sech nodréiglech als richteg erausgestallt. Dës Situatioun war eng grouss Belaaschtung fir déi betraffe Mataarbechter vun der Sportschoul.

En Deel vun dësem Problem huet d'Chamber mam Gesetz vum 29. Juli 2023 zur Schafung vun engem nationale Sportsinstitut geléist. Mee dat entspriechend groussherzoglecht Reglement, deen déi genee Montante fixéiert, gouf vum Staatsrot staark kritiséiert. Dës weist a sengem Avis vum 11. Juli notament op eng Rei Mängel an den normenhierarchesch méi héijen Texter hin, déi als legal Basis fir dat genannte Reglement dëngen a warnt, datt de ganzen Text am Zesummespill mat dem Artikel 45 Paragraph 2, den Artikelen 102 an 112, an dem Artikel 117 Paragraph 5 vun där neier Verfassung riskéiert seng Gültigkeet ze verléieren.

An deem Kontext hätt ech folgend Froen un den Här Minister:

- 1) Kann den Här Minister seng allgemeng Positioun zu deem Dossier elaboréieren a präziséieren, wéi hien zu deem uewen zitéierten Avis vum Staatsrot steet?
- 2) Wat gesäit den Här Minister vir, fir dës Situatioun méiglechst séier ze regulariséieren, fir eng Widderhuelung vun dëser onméiglecher Situatioun fir d'Sportspersonal onbedéngt ze vermeiden?

Mat déiwem Respekt,

Jeff Engelen
Deputéierten



Äntwert vum Här Sportsminister op d'parlamentaresch Fro n°110 vum 14. Dezember 2023 vum den honorabelen Deputéierten Jeff Engelen.

1. Kann den Här Minister seng allgemeng Positioun zu deem Dossier elaboréieren a preziséieren, wéi hien zu deem uewen zitéierten Avis vum Staatsrot steet?

Nodeems ech mir ee Bild vun deem Dossier gemaach hunn, kann ech net bestätegen, dass, sou wéi et am Ufank vun der parlamentarescher Fro affirméiert gëtt, déi extern Mataarbechter vum Sportlycée jorelaang ouni legal Basis bezuelt gi sinn. Wuel huet déi legal Basis mam Akraafttriede vun der Modifikatioun vum 2005ter Sportsgesetz op de 15. September 2023 gewiesselt - dëst heescht awer net, dass et virum 15. September 2023 keng legal Basis gouf. Déi legal Basis, fir dass déi extern Mataarbechter vun de Formatiounszentere vun de Federatiounen zënter 2001 bezuelt konnte ginn, war effektiv den Artikel 13 vum 1988er Gesetz iwwert déi administrativ Struktur vum Sport hei zu Lëtzebuerg.

Well mat der Schafung vum INAPS duerch d'Gesetz vum 29. Juli 2023, den Artikel 13 vum besotem 1988er Gesetz op den 30. September 2023 awer abrogéiert ginn ass, ass mat enger Modifikatioun vum 2005ter Sportsgesetz op de 15. September 2023 eng nei legal Basis geschaf ginn, fir déi extern Mataarbechter vun de Formatiounszentere vun de Federatiounen weiderhi kënnen ze bezuelen.

Zum Zäitpunkt vun dem besote Dossier wor ech nach net an der Funktioun vum Sportsminister, mee méng Matarbechter, respektiv d'Matarbechter aus anere Ministère, hu sech mat de Kompetenze vun der *Direction du contrôle financier* (DCF), déi laut dem Gesetz vum 8. Juni 1999 d'Kontroll vun den staatlechen Ausgaben sécherzestellen befaasst. Heiraus geet ervir, dass ënnert anerem d'Vérifikatioun vun der Konformitéit vun den Ausgaben mat de Gesetzer, Reglementer, Konventiounen oder aaneren Regierungs- oder Ministerentscheedungen zu den Kompetenzen vun engem "contrôleur financier" gehéiert.

Op Basis vun all deenen Elementer, schléissen ech, dass et zu all Moment eng legal Basis gouf, fir besote Mataarbechter ze bezuelen.



2. Wat gesäit den Här Minister vir, fir dës Situatioun méiglechst séier ze régulariséieren, fir eng Widderhuelung vun dëser onméiglecher Situatioun fir d'Sportspersonal onbedéngt ze vermeiden?

Ech wëll op dëser Plaz ënnersträichen, dass de Staatsrot a sengem Avis wuel Remarque gemaach huet - dës Remarquen awer net zu enger opposition formelle gefouert hunn. An deem Sënn wäert d'Reform vum 2005ter Gesetz och net iwwert de Knéi gebrach ginn an ech wäert mir déi néideg Zäit zougestoe fir besoté Projet mat där néideger Qualitéit op den Instanzewege ze schécken.

Lëtzebuerg, de 16 Januar 2024

Le Ministre des Sports

(s.) Georges Mischo